

四庫全書

史部

欽定四庫全書

史部

硃批諭旨卷二百十五之二

詳校官尚書臣德保

編修臣裴繼覆勘

總校官中書臣朱鈐

校對官助教臣蔡鎮

謄錄監生臣段文新

欽定四庫全書

硃批諭旨卷二百十五之一

硃批鄂彌達奏摺

雍正六年九月十一日貴州布政使臣鄂彌達謹

奏為奏

聞事竊照普天疆土自

國朝開闢以來休養生息民間戶口日繁宜乎無不闢
之土無不耕之地乃查黔省

奏報冊內現徵錢糧已熟田土及陸續新墾自首田
土共一百四十七萬九千五百畝零未墾田土八
十七萬五千有奇以全省之繁庶豈未闢田土尚
有如此之多其間或係小民無知欺隱或為豪棍
從中阻撓或為官吏徇私抑遏以致報墾寥寥均
未可定臣自到任以來清查軍田料理開墾出示
曉諭至再至三不意一年之限已滿據各屬開報
者不及荒蕪十分之一臣細加思維與其懲治於

將來不若清理於目前統計州縣田畝曠闕多者
隱匿自多曠闕少者隱匿自少今黔省各處曠闕
纍纍自應將最多者先為清丈臣今不揣愚昧欲
將侵隱最多之鎮遠縣田地俟秋成後委員查丈
果係實在曠闕者招佃給本開墾如已舉首及已
報墾而為官吏侵蝕分肥者即為叅革究擬如係
豪強地棍侵占者亦即嚴拏治罪庶各屬官民間
風畏惕不待逐處清丈必然首報清楚將見黔無

曠土賦額漸增其於

國計民生均有裨益矣緣事關清丈合先具摺奏

聞伏乞

皇上睿鑒謹

奏

清丈之說不可輕舉當與督撫詳悉斟酌此奏甚屬孟浪爾原不諳外任豈得如是率意妄為凡百須向歷練有識見人再四熟籌然後定議方無謬誤蓋地方一舉

一動關係民生休戚非旗下事務部院案件之可比也

同日又

奏為奏

聞事竊查黔省有官莊學租一項額徵米三千九百三十六石九斗零內除支給鋪兵米一千九百三十九石三斗外其餘米石歷屆

奏冊俱作賑濟寒生窮民報銷其實止給省城寒生窮民米二百餘石鳴贊生員九十六名餘剩之米

悉為各衙門官役食用相沿為例迨至雍正三年
經署撫臣石禮哈

奏明變價歸公分給各官養廉前司祖秉圭以職官
不便分沾貧民之食又因

奏銷冊內未除仍以寒生窮民姓名造報是以定議
將前項餘米分給巡撫司道各衙門役食并鳴贊
生員以及省城貧民寒生暨各府州縣貧民寒生
食用在案臣到任以來查此項米石雖係歸公但

事關

奏明之項不得不細為籌畫除雍正五年之額米已經前司議定通行飭遵似難更改外其六年之米除給鋪夫口糧之外餘米似宜斟酌舉行查生員之內貧富不等而品行亦有高下若據呈詞即行批給恐有無耻之輩冒認單寒無從查其虛實似應行令該教官查明取結詳送學院核實移咨院司轉飭地方官照例撥給至孤貧一項原應計口

受食豈可定數派撥似應通行各屬確查如建有
養濟院房屋在內居住之孤貧按照人數亦依極
貧成例支給其無養濟院之處貧民乞食往來無
定毋庸撥給至鳴贊一項有迎接

詔旨宣講

聖諭之責應請照舊准其支食其各衙門人役自有工
食與貧民不同未便支食官莊米石查各屬罪犯
解省覆審俱是沿途求乞殊堪憫惻似應將此項

米石每名每日給與八合將所給口糧數目令各屬按季冊報稽核以上幾項核實支給之外每歲約餘米一千餘石應令各屬變價解司於秋成後就近買米存貯省倉如遇青黃不接之際零星平糶以濟民食仍於秋後買補貯倉如此行之年久不特積貯漸增抑且民食有賴於

國計民生均有裨益也緣此項米石現在開徵又據各役紛紛具呈請領臣不便支給合先具摺奏

聞伏乞

皇上睿鑒謹

奏

此事應呈詳督撫酌定何得如是自立主見耶將朕所批二摺硃諭與鄂爾泰沈廷正看

雍正七年正月十一日貴州布政使臣鄂彌達謹

奏為恭謝

天恩事竊臣庸陋之質荷蒙

隆恩特授黔藩自到任以來凡有關係

國計民生靡不朝夕思維殫竭智慮以冀少有裨益
遂將摘丈鎮遠縣欺隱田地與官莊學租米石定
議撥支二事冒昧繕摺奏

聞奉有

硃批臣跪讀之下感激悚懼愧悔無地遵即齎送督撫
二臣閱看其摺內事宜應聽督撫會商審擇行止
覆

奏外臣自顧何人得沐

聖主諄切教訓俾孟浪不諳之處翻然悔悟知所遵循
嗣後一切辦理公務自當悉心與歷練有識見人
慎重商酌不敢妄生意見以仰副

皇上諄諄教誨之至意所有感激微忱理合繕摺恭
謝并繳

硃批原摺為此謹

奏

覽奏知道了秉公敬慎勉力為之

同日又

奏為據實陳明仰祈

睿鑒事雍正六年十二月初九日撫臣沈廷正傳臣入署將其所奏臣家人蕭大在鎮遠地方欲買使女被顏致明騙詐銀兩一摺奉有

硃批令臣開看臣伏讀

皇上硃批此事必須兩罰方為平允若回護藩司家人

而偏究顏致明斷乎不可將此諭亦令鄂彌達看欽
此臣跪讀之下感激涕零惶恐無地隨嚴訊家人
蕭大據供小的跟隨赴任時五月二十四日因小
的中暑在常德任宗陽客店養病聽得那邊買使
女賤曾有店家之弟來說原任江西裴大廳的兒
子有箇使女要賣小的意欲看定再回請示原叫
他領來看過因不好就罷了到七月初間病好起
身於二十三日到鎮遠府在龔家歇店住了一夜

黑早就走並不認得姓顏的亦無銀子被人騙去
等語臣恐家人或有隱匿不吐實情亦未可定遂
將蕭大移送臬司衙門嚴加訊究而撫臣不令臬
司究審蕭大只教臣照摺內一一應實臣以事屬
瑣細若過於辯白殊失

朝廷大吏之體所以寧令家人認罪不敢置辯隨將家
人在常德情由認作鎮遠舉動事本未成不曾被
騙等語錄一供單送撫臣在案伏念臣受

似此等奏如佛喜馬哈博爾多無不皆然較爾更為懇
皇上洪恩教誨多年畀以管鑰之任在犬馬之性亦知
切朕自愛即不信而且厭觀矣滿洲官員大都至操守一
節即不堪問可謂顏面壞盡奈何奈何今只看爾福量
大小及爾祖宗積德厚薄耳朕竟無法可施言及此曷
勝浩嘆敢狂縱至此其間情事虛實難逃

聖明洞鑒臣不敢瑣瀆

天聽今臬司嚴審致明並不認識蕭大亦無買人騙銀
之事請提證佐質訊撫臣云此事奉

旨兩罰可不必提證佐惟令臣照前稟寫供送臬司具

詳即為回奏臣若過為辯白反屬偏護家人如不
將實情

奏明又蹈欺罔之罪今雖照撫臣之意而行其中實
在原委不得不直陳

聖主之前此後惟有日夜兢惕以仰副
皇上曲賜矜全之

洪慈為此謹

奏

斯事沈廷正所奏甚悉已有旨矣

雍正七年四月十五日貴州布政使臣鄂彌達謹
奏為奏

聞事竊查黔省地方山多田少每歲民苗秋成之外兼
賴春花資生所有豆麥雜糧均藉雨水調勻以期
豐收茲屆春收之際通查各屬雨水及時春花約
有十分收成臣親往郊外細加察勘據農人咸稱
所種豆麥雜糧菜蔬顆粒根株較之上年加倍肥

大或已經秀實或現在收穫皆有十分至秧田雨水需足稻苗暢茂現在始行插秧將來秋成可期大有除俟各屬收成分數報齊之日彙冊詳送督撫二臣

奏報外所有春花豐收情形今因恭繳硃批之便具摺奏

聞謹

奏

據奏雜糧收穫稻苗暢茂欣悅覽之

同日又

奏為欽奉

聖訓事竊臣前因陳明家人蕭大一事繕摺具

奏奉有

硃批臣跪讀之下感憤交集念佛喜馬哈博爾多等身
受

皇上隆恩既不能克己急公恪供職守以圖仰報萬一

乃復利欲薰心貪賊枉法下愚無耻莫此為甚雖
置重典亦不足以蔽其辜今蒙

皇上天恩恐臣不自省惕仍蹈錮習諄諄

訓誡不啻慈父之教誨赤子身非草木應知感奮況臣
家本寒微向從節儉所有

賞給養廉儘足用度何敢稍存不肖之念如資性利鈍
則限於天分辨別物理則限於學問至於操守實
能一心主之臣賦性既屬愚鈍辦事又多未諳若

復不能潔已奉公以蹈貪賊枉法之轍乞

皇上立置重典以為負

恩忝職之戒謹將奉到

硃批原摺另封恭繳謹

奏

非言之難而行之為難也朕前諭甚明今於三人中止
將佛喜所奏一二事發來爾看令朕覽此數行空文遂
深信其心行可乎

雍正七年八月十二日貴州布政使臣鄂彌達謹
奏為恭謝

天恩事竊臣承准戶部照會議覆臣具奏京局所需鉛
觔動支黔庫捐納銀兩買運至漢口交商人轉運
可節繁費一摺部議以事屬難行不便更張具

題奉

旨依議戶部所奏甚為明當鄂彌達現為貴州布政使
於地方事務必將原委利弊確查明白方可陳奏豈

風聞言事者可比今乃以偏私之見遽欲更改成例
冒昧瀆陳甚屬不合著嚴飭行欽此照會到黔欽遵
在案臣跪讀之下不勝惶恐愧悔交集實緣臣初
任外吏見事多疎因思黔省產鉛甚多商人買運
費繁欲節省錢糧起見未及詳查原委一時冒昧
瀆陳蒙

皇上天恩不即交部重處諭令飭行聞

命自天感激無地臣嗣後凡於一切事件惟有虛衷詳

慎不敢偏執已見以仰副

聖主訓誡之洪恩所有感激微忱理合具摺恭

謝伏乞

皇上睿鑒謹

奏

常時返省確知已係庸平材質則將日有進益稍若自
以為是一涉盈滿驕矜豈止謬誤一事二事而已哉

同日又

奏為恭繳

硃批原摺事竊臣具奏欽奉

聖訓事一摺奉到

硃批非言之難而行之為難也朕前諭甚明今於三人
中止將佛喜所奏一二事發來爾看令朕覽此數行
空文遂信其心行可乎欽此伏念

上天不可欺

主恩不可負神明鑒察形影相隨欺罔狡詐未有不敗

露者臣雖至愚亦知自省惟當恪遵

訓旨即以佛喜之言行相違為終身炯戒時時警惕竭
盡駑駘斷不敢飾空文而忘實行以期仰報

聖恩於萬一合將奉到

硃批原摺二扣并佛喜奏摺二扣另封恭繳為此謹
奏

果能存誠務實終身堅守不移

上天必不汝負也

雍正八年正月二十四日貴州布政使臣鄂彌達

謹

奏為社倉請專委任以明勸懲以收實效事竊查建立社倉勸民捐穀以備荒歉令官吏不得過問聽民自便雖有不肖官吏書役欲上下其手實無從而施其伎倆法至善也第百姓愚昧恐奉行日久視為泛常秋成所捐之穀青黃不接之時仍舊自用如遇稽查虛捏甘結掩飾一時司倉者向來止

取家道殷實之人令其掌管名雖禁其出入不公
並未立有考成人遂不知懲勸且司其事者俱係
鄉閭之人任其虛捏漫無稽查臣再四籌畫若主
之於官難杜胥役擾累之弊若聽之於民又多虛
捏惟有捐積之事聽之於民而稽查勸懲之方委
人專任方有實濟請於每州縣分東西南北四鄉
鄉擇適中之地建立倉社十戶立一甲長五十戶
立一社長司倉者令地方官於本地候補候選及

考職州同州判以上人員內秉公選擇品行端方者四員每倉著一員總理稽查勸懲勸諭捐積將現在之穀併續捐之穀登簿申報地方官轉報上司存案青黃不接之際願借者由甲長上之社長社長率本人向司倉之人交票司倉者驗實登簿發給俟秋成加息完倉如逢小歉照例免息年底令地方官上倉稽查取結加印申報上司如有虧空奉行不力之處即行揭報

題叅倘地方官不行揭報經上司查出將地方官照
扶同徇隱例分賠如三年內勸捐積多收放公慎
許地方官申詳督撫核實具

題候選考職者即行錄用應選應補者加陞一級以
示獎勵如此則委任專而積貯實似於社倉不無
裨益是否有當伏乞

皇上睿鑒謹

奏

如此則社倉之良法壞盡矣據奏年底令地方官稽查
出結申報上司立定考成是所謂官倉何名民社耶若
照所奏必遇百姓真實愛戴如父母之賢有司方可否
則徒增無限弊端於事何濟之有所見甚屬悖謬

雍正八年七月初七日貴州布政使今陞廣東巡

撫臣鄂彌達謹

奏為敬陳管見仰祈

睿鑒事竊照古州一帶地方向為生苗盤踞未通聲教

今蒙

皇上德威遠播指示方畧督臣鄂爾泰調度得宜俱已
嚮化其安營設汛築城開河將已就緒惟是苗性
反覆不常一切善後事宜實屬要務不得不急為
籌畫者也查古州清水江等處新闢苗地甚是遼
濶苗獍戶口不下數十餘萬今古州清江丹江都
勻黃施來牛各鎮協營兵丁合計舊撥新設共九
千九百名尚恐地廣苗衆不足以資彈壓倘遇有

事除去防設塘汛守城再分布進剿防遏黨援之
遊兵則恐現在之數不敷分用臣之愚見請於古
州都勻丹江清江四處各添兵一千名以資調遣
俟三五年後苗獮感化已深帖然無事然後再議
酌減至添兵後兵糧更屬急需查通省新舊兵丁
共二萬九千六百四十三名每年需糧一十萬六
千七百一十四石八斗額徵秋糧共一十一萬六
千八百一十石有奇內附近各營可以設法輓運

支領本色者只有六萬三千七百餘石僅足半年之糧其餘離營遠難以輓運若盡行折價則新設苗疆糴買維艱如令百姓每年遠運軍營不特有妨農業恐致滋擾若令附近州縣改銀徵米難免周章且統計每年額徵之數則新舊兵丁與現請添設四千名之兵糧尚不敷支給臣再四思維查湖南乃產米之處而辰州府所屬之沅州與黔屬玉屏縣聯界附近軍營至貴州省城僅止八百

一十五里至湖南省城則一千五百八十里較其
遠近相去一半況今清江一帶河道開通自沅抵
黔水路往來尤為便利仰懇

聖恩准將沅州割歸黔省管轄所有該州每歲額徵秋
糧用船直運清江都勻丹江等協營存貯就近支
給至於都江河道現在開通舟楫直達粵西柳慶
二府查二府屬近水州縣歷年支放餘剩改貯之
穀甚多若令古州按季遣員赴粵西近水州縣支

領接濟不特輓運省力而在黔無馱載之苦在粵
免紅朽之患殊為一舉兩得又查古州八萬苗地
出產樹木棉花白蠟等項向緣河道不通生苗阻
截以故商販稀少且黔地素不產鹽日用皆藉川
淮鹽斤價值甚貴爰是苗民多有食淡兼之布帛
鮮有今河路疏鑿開闢已廣正可乘時利民如蒙
俞允將沅州歸黔則運米之回空船隻即載苗地之
產貨物帶往湖廣江浙各處發賣賣完之日即載

淮鹽紬布赴黔販賣如此往來運售交相濟用不
數年間苗人與客商交易知獲厚利則謀生之苗
猺漸化為守法之良民地方官員再加以隨時撫
綏則瘠薄之邊方將變為富饒之樂土矣再查四
川重慶府所轄之酉陽司并所屬之邑梅平茶石
耶地把等土司離府十八站離黔屬之思南府僅
止五站地界相連因離川省寫遠鞭長莫及以致
該土司等匿犯藏姦橫行不法且其地方遼濶土

脈肥沃每有銅仁等府貧窘百姓在彼開墾生理
完納土司租賦稍不遂意百般凌虐考之黔志思
南府屬之甫南圖地方久被該土司占去似此侵
課害民亟宜鈐束清理應請將酉陽等司就近割
歸黔省管轄如有應墾地土即給照附近窮民令
其前往照雲貴開墾事例自行開墾并該土司田
土一併查明照例納賦以資糧餉如此非特該土
司等得以就近約束不敢滋事而於

國計民生均有裨益矣臣確訪苗情審度形勢故敢直陳管見是否有當伏乞

皇上睿鑒施行謹

奏

鄂爾泰悉心詳議奏聞候朕裁奪

雍正八年九月初六日新任廣東巡撫臣鄂彌達

謹

奏為恭報微臣起程日期仰祈

睿鑒事竊臣荷蒙

聖恩補授廣東巡撫接准部文已經繕摺奏謝

天恩恭請

陛見候

旨遵行嗣緣調任布政使張允隨在滇交代未能即赴

新任奉督臣鄂爾泰委令糧驛道署理藩篆臣即

於雍正八年七月二十七日將布政司印信委員

齎送糧驛道王廷琬查收署理并將臣任內經手

一切錢糧逐一交代明白聽候查明出結詳報外
查廣東乃沿海要地關係重大聞

命以來日夜恐懼因思督臣鄂爾泰公忠為國識見深
遠又聞伊抱病臣向在黔藩任內凡大小事務無
不承督臣剴切指示今署司查核交代冊籍尚需
時日臣隨星赴滇省請商海疆一切要務自臣到
滇督臣病已全愈諸凡事宜承督臣諄諄開導明
白講論受益實多臣即回黔於九月初六日起程

赴粵東新任訖再臣自黔起程至滇沿路禾稻暢
茂碩大堅實問諸民苗僉云數十年未有如此豐
盛臣目睹豐亨景象不勝踴躍歡忭之至合併奏

聞謹

奏

覽奏知道了當夙夜省察竭力黽勉照鄂爾泰之居心
以居心效鄂爾泰之行事以行事則將來必不虛負朕
期望委任之恩也勉之勉之

雍正九年正月十二日廣東巡撫臣鄂彌達謹

奏為奏

聞事竊臣荷蒙

聖恩巡撫粵東已將入境到任日期具疏

題報在案臣仰體

聖主軫念民生至意於湖南廣西經由地方訪問湖南
今歲春間覺雨水過多而秋成倍於往年廣西亦
屬豐收米價甚平臣抵任後行查粵東秋收據布

政使彙報各屬收成八九十分不等米價每石四錢五六分起至六錢七分不等年登大有萬民熙皞臣睹此昇平景象不勝懽忭之至惟勤宣

聖天子保赤之深仁使海疆黎庶返醇歸樸共樂

聖世以仰副

皇上愛養元元之

聖心臣謹繕摺奏

聞謹

奏

覽奏俱悉爾初抵任即值歲熟米賤之時原屬可慶然當倍加寅畏不可少有肆志

雍正九年二月初十日廣東巡撫臣鄂彌達謹

奏為敬陳粵省情形仰祈

睿鑒事竊查粵東山海交錯素多盜匪或嘯聚山谷或勾連蛋艇人少則暮夜偷竊人多則白晝刦搶甚至百十成群私挖山礦一經官弁查拏輒行拒捕

致傷兵役其有嗜利惡徒爭攘私礦竟成仇敵命盜多由此起從前各官因循故習凡遇案件半多諱匿半由外結因而法令廢弛風俗日壞種種積習難以枚舉臣於抵任後一面與文武諸臣和衷辦理嚴飭地方有司協力整頓每於親審案件內核其情罪可惡者即痛加懲處事事執法究擬近見若輩稍有畏懼又查廣東地方土豪惡棍在在皆有若不將尤甚者重懲做衆餘惡仍然玩法而

罹重罪者反多今訪有潮陽縣惡棍蘓阿武東安
縣惡棍嚴選乳源縣惡棍葉聯芳并其子葉清誠
惠來縣惡棍黃高飛家藏軍器窩匿盜賊欺壓良
懦動輒殺人姦淫詐偽無惡不作葉聯芳黃高飛
現今拏獲發審其蘓阿武嚴選二犯現在密拏但
弋獲到案若待提齊受害質證則由縣府司到臣
輾轉審解未免耽延歲月況伊等積惡數十年黨
羽數百人受累者不啻千百家若輾轉質解受害

之民拖累甚衆且恐疎脫臣愚以為此等豪棍人切齒一經審明即應提至市曹杖斃示衆庶不法之徒聞風斂迹即受害者之冤抑亦得早伸矣再臣思凡事必當探本窮源源清則流自潔粵東無產無業之民甚多查高雷廉等府地廣人稀必須設法調劑使其衣食有藉方望風俗還醇臣現在飭查實在荒地水利並保甲練總等項俟查明確實將如何料理之處悉心妥議另

奏外所有地方情形合先具摺奏

聞伏乞

皇上睿鑒批示遵行謹

奏

訪拏豪惡最尤者懲一警百固屬善舉但一經審明即提至市曹杖斃示衆之論當極加詳慎恐該有司未必盡屬公明其中倘有錯誤或致冤抑所關豈淺鮮哉

雍正九年三月二十二日廣東巡撫

臣鄂彌達謹

奏為請定保甲練總功過以期盜息民安事竊照弭盜之法保甲最善臣到任後飭令各屬印官親身編點有地方遼濶者即於

命往試用人員遴委辦理漸將告竣然保甲既清而村長保正練總三項尤為保甲之要查從前村長惟論年齒保正則按年輪當練總則聞漢充數迨後地方有司凡遇勾攝人犯來往公務以及護送均於保正練總是累遂視為苦役各皆告退即有存

名亦皆無賴。包當日求有事而已。臣查粵屬各鄉有大姓小姓之分。大姓則戶口數千餘。丁小姓乃雜姓。附居遇事。惟大姓是聽。今擬以大姓戶內擇言行公正之貢監。立為鄉長。令其稽查本家以及附居雜姓。隨時勸令務本力農。不得遊手好閒。倘有違犯。許即稟明地方官就近查究。擬將役滿考職在籍候選之吏員。遴當保正使之盤詰匪類。摘伏指姦。倘有滋事。許地方官不時申究。再就於武

生鄉勇中擇有力而嫻武藝者以充練總無事則
巡邏防範有事則協力救援倘有偷安多事許保
正就近稟究若不立以功過予以勸懲恐任事不
力擬於三年之內一鄉之中地方寧謐無出境為
非者鄉長貢生咨部以教職即選監生已考職者
即以應選之職銜即用其未考職者給以八品頂
帶以示鼓勵保正查其考職年分咨請先用練總
補伍食糧遇有外委把總缺出選擇挨補如三年

之內有藏姦納匪犯案一次者鄉長保正練總各行記過至有三犯鄉長革去貢監保正革去職銜練總責革一切往來公務永禁不得濫役如地方官因循庇護縱姦殃民查確糾叅庶責有攸歸法無寬縱而盜風或得以少息矣為此具摺陳

奏伏乞

皇上睿鑒施行謹

奏

此奏甚不合宜其乖謬處甚勝批諭

雍正九年七月十五日廣東巡撫臣鄂彌達謹

奏為奏

聞事竊查硫磺一項乃配造火藥所必需前據洋行商人陳崇義赴布政司呈報大西洋部多牙國夷商榮貽觀來廣東壘門生理住家發夾板船往呂宋國貿易順便帶買硫磺約八百擔裝回壘門今知例禁向商人求議每擔價銀四兩伍錢情願易換

水硨等情經司議詳准其照價易換前來臣查硨
礪係違禁之物不便聽夷商自行變賣再查貴州
運粵水硨原係變售抵帑之項今易礪變價事出
兩便且本省旗標各營現需製造常存火藥所需
礪斤已經督臣郝玉麟具

題委員在於仁化地方設爐煎熬今既有此項礪斤
自應留用將仁化縣設爐煎熬之處停止如此一
轉移間不特無採辦之煩亦免匪類潛藏致生事

端之慮臣即批司准行在案又恐該夷商將磺斤販賣外國隨與布政司商酌即面詢該夷商呂宋每年所出磺斤之多寡據稱約畧不下有數萬餘斤當即諭令將所出硫磺切勿賣與外國年年運至粵省內地通知洋商具稟藩司動支司庫公項銀兩收買或爾等需用他物照爾等所用給發該夷商歡忻踴躍而去嗣後每年所買磺斤除粵東應用外餘磺存貯行內知會隣近各省令委員赴

粵採買將價歸還原項以免販賣外國之弊事關
夷商帶運違禁之物理合具摺奏

聞伏乞

皇上睿鑒謹

奏

如此權宜通變甚是

同日又

奏為奏

聞事竊查粵東今歲自春徂夏雨暘時若早稻豐收晚禾播種山區海甸咸歌大有詎五六月間霖雨連朝潦水陡漲據肇屬之四會縣報稱該縣屬內大小圍基皆屬穩固惟大興一圍係頂溜之處舊有石竇一座於六月初三日潦水驟至漫溢圍頂衝動竇石卸開竇傍圍基近圍田畝魚塘被水浸溢等情臣聞報即飛飭肇羅道張渠支領司庫公項銀兩購備木石赴大興圍相度情形星夜搶修一

面委員協同地方官查勘撫恤又據雷屬之遂溪縣報稱五月十三日大雨晝夜縣屬低窪田禾間被浸溢民房亦有傾倒又據廣屬之增城縣報稱六月十二三等日大雨至十四日山水漲發當水房屋多有傾倒低窪處所田禾被淹又據惠屬之長寧縣報稱六月十三日風雨徹夜溪水陡發城外當山水衝溜處草房倒塌者多人口俱皆安全各等因具報前來臣俱委員給銀令其齎往被水

等處會同地方官分頭查勘如有田禾浸淹者飭
令設法疏濬無力播種者借給穀種民房衝倒者
查明無力窮民酌給修葺完好毋致失所現在據
報水已退消民皆安業恐厯

聖懷合將緣由繕摺奏

聞謹

奏

皆緣平日不行預備臨時又不慎防以致如此亟當勘

明已衝者力督搶修被淹者加意撫卹可也

雍正九年八月二十四日廣東巡撫臣鄂彌達謹

奏為奏

聞事竊惟粵東風俗澆漓向多貪詐近來仰賴

皇上德化漸摩淪肌浹髓海隅蒼生皆已感格即甲冑

之士亦能見利思義如右翼鎮標右營辭糧兵丁

高洪才者雍正八年十一月初十日早有江西窯

匠遺一布袋在韶州府南門河邊適高洪才渡河

見而拾取開視內貯銀一十一包共重九十一兩五錢當有民人潘得用在彼浣衣見拾維時洪才拾金不昧隨即邀同得用往浼關帝廟僧人翠雲書寫招帖遍訪原主比原主慌忙尋覓洪才核對銀數相符即將原銀給還絲毫不染雖爾時洪才僅詢知其為江西窯匠不復問其姓名但拾銀之後有書寫招帖之僧人翠雲已屬確證且伊從前曾拾銀三次皆給還原主金有等收明鑒鑒觀其

平日之廉潔則今日之還銀自非虛捏據布政司
詳據縣府轉據士民舉報前來臣隨給匾額表揚
并通行閩屬曉示使人人則效處處觀摩仍飭該
縣立碑傳後以示鼓勵外臣不敢壅於上

聞謹會同督臣郝玉麟合詞具

奏伏乞

皇上睿鑒謹

奏

該部議奏

同日又

奏為奏

聞事竊臣猥以菲材荷蒙

皇上隆恩簡畀封疆重寄莅任以來無時不仰體

聖心以察吏安民為念今查按察使黃文煒居心坦白

辦事勤謹人尚明晰操守亦好糧驛道陶正中辦

事謹飭才具亦優廣南韶連道李可淳人尚明白

辦事小心但稍欠淳樸肇羅道張渠才具優長辦事勤謹再加歷練即成有用之才高雷廉道毛世榮謹飭吏治尚欠熟練惠潮道劉運鰥為人老實才具平常吏治甚屬不諳不宜外任海南道王璠謹慎安靜足供厥職鹽法道馮元方辦事勤謹才亦可觀尚堪供職廣州府知府吳騫才具明敏辦事歷練韶州府知府陳鴻熙才具明敏辦事勤慎肇慶府以同知銜管知府事劉正遠為人老實才

其平常勉強供職潮州府知府胡恂敏捷練達實
係幹員高州府知府張兆鳳為人誠實辦事勤慎
雷州府知府葉思華才具平常辦事尚勤廉州府
知府劉夢正小心謹慎尚能供職瓊州府知府宗
思聖才具頗優操守亦好惠州府知府吳簡民南
雄府知府潘思渠看來人俱明白到任未久尚須
試看直隸羅定州知州王植人尚直樸但辦事少
欠歷練連州知州陶德燾人尚明晰辦事謹慎理

猺同知龐嶼才具優長實係能員潮州府同知龍
為霖實心辦事不避繁難實屬幹濟之員南海縣
知縣劉庶才具明晰操守廉潔辦事歷練署乳源
縣事州同應陞王元樞為人耿直頗有膽氣奮力
辦事才具亦優臣查官員之賢否關乎民生之休
戚謹將聞見最確之各員出具考語先為奏

聞其餘各員臣察試續陳伏乞

皇上睿鑒謹

奏

汝既非明敏出衆之資又未具有超卓之見甫經到任
席尚未暖何能將如許屬員一一俱已聞見最確耶此
奏殊屬草率輕忽亦可謂不自量無恥之至

同日又

奏為請

旨事竊臣到任後查閱臣標所屬左右兩營兵丁技藝
生疎且多疲弱甚至甲械舊壞不全隊伍亦不整

齊臣遂逢三八日期親督操演竭力整頓諄切告

誠立以賞罰其老弱不堪者革糧另募有軍械不
備者臣即捐給陸續添補目下隊伍技械稍有可
觀惟是營中公費無藉恐日久仍至闌茸查粵東
各營每兵百名俱留糧三分以充公用故營中一
切公務得以有恃惟撫標從前未經議及是以公
事多有掣肘而兵丁需用軍械遂不克及時整理
今臣仰體

聖恩一視同仁請照各營之例每兵百名存留三分充
公收貯中軍衙門遇有修補甲械之時動支料理
每年報臣核銷庶公用有資而軍威整肅其於沿
海行伍大有裨益矣臣未敢擅便伏乞

皇上睿鑒批示遵行謹

奏

當仿照各省撫標成例而行

雍正九年九月初六日廣東巡撫臣鄂彌達謹

奏為奏

聞事竊照粵東地方環山濱海民犺雜處所有韶州府屬之曲江英德樂昌乳源四縣界內有一種犺人盤踞其中約計人數不過千丁多係貧窘怠惰不勤耕種者偶或飢寒即出為匪其柳坑水源宮二坑尤甚前經該地方各官稟請增設營汛控制臣思增設營汛如人少則不足以控制彈壓多則日久不無擾累滋事因查英德縣所轄各犺自明季

設立黎陳二姓徭目以來衆徭有所統屬至今帖然不敢為匪向使柳坑水源宮二處亦皆設立徭目時加約束則自不敢肆行為匪遂與兩司酌議設立徭目約束即於柳坑水源宮二徭之中擇其強幹誠實而向無過犯者二名給以徭目劄付每月再賞銀三兩令其管轄徭衆即令徭目將各坑徭人編定丁戶每五十戶立一甲長甲長每月給銀五錢使其分管各徭按戶稽查徭目徭甲每月

一次到縣當堂支領工食所給銀兩應於公項內
動支如一年之內所管徭人無盜竊者除給工食
外仍行給賞花紅以示鼓勵倘有盜竊之案發覺
責令徭目緝拏如或徇隱捏報經兵役拏獲者則
將該徭目并徭甲一并分別究處再徭山一帶荒
土甚多向因乏本耕作以致曠廢應令該地方官
查明借給牛種責令徭目徭甲等督令盡力開墾
各安生理再將

聖諭廣訓一十六條及強竊搶奪並窩主各條內緊要
律例摘叙簡明語句分刊二本發給徭目徭甲等
朔望宣講化導使既知

朝廷之法不可干犯又令其衣食有所資藉則各徭自
可帖然矣為此繕摺具

奏伏乞

皇上睿鑒謹

奏

此事在汝等督撫斟酌合宜而為之觀所料理似屬允當

雍正九年十月二十三日廣東巡撫臣鄂彌達謹奏為欽遵

聖諭實力奉行事雍正九年八月初一日據新任布政使臣楊永斌至臣內署密交

諭旨一道臣跪讀之下仰見

皇上指示周詳凡屬臣工優劣皆在

聖明洞鑒之中查方願瑛秉性姦邪存心狡詐身為大吏受

國深恩乃不思報效端以沽取虛名阻撓實政致使文武各立一途不相和協臣未到任之先固已聞知而到任之後細加察訪皆因文武官弁遇事各執已見總不面為商酌遂致心生疑忌不克和衷辦公臣俱諄切訓飭文武各員務須同心共濟不得彼此參商至於粵東邊海巖疆盜風甚熾人多

嗜利輕生臣荷蒙

聖恩委任封疆敢不悉心開導立法勸懲冀其革面革心共為

盛世良民所有居心行事如雲貴督臣鄂爾泰者實屬封疆師範臣時深效法惟恐不逮今奉到

聖諭如耳提面命俾臣知所遵循得與布政使臣楊永斌同心協贊實力整頓務使文武和衷盜息民安以圖仰報

天恩於萬一理合繕摺

奏覆伏乞

皇上睿鑒謹

奏

覽奏知道了但以言行相符為務

同日又

奏為恭報粵東秋收分數仰祈

睿鑒事竊照粵東地方一年兩次耕穫民多力穡今歲

夏間已獲豐收茲據布政司將各屬收成分數彙
報前來查廣州南雄韶州惠州潮州肇慶高州雷
州廉州瓊州十府並羅連二州及各所屬收成俱
有六七八九十分不等再各屬米價每石自五錢
四分至七錢不等今新米上市價值自必漸減家
給人足戶慶盈寧所有各屬收成細數臣謹另繕
清摺恭呈

御覽伏乞

皇上睿鑒謹

奏

粵東秋成分數以手加額覽焉

硃批諭旨卷二百十五之一